

Seiqcib Bi Haenqrengz Buekguh Minzcuz Doxgiet Bienq Yiengh Hung

——Sanhgyangh Dungcuz Swciyen Sam Aen Minzcuz Yangh Guh Hozdung Angqhoh Laebbaenz 40 Hopbi

Bonjbauq siusik (gicej Cau Dwzfeih) 10 nyied 10 hauh daengz 12 hauh, Liujcouh Si Sanhgyangh Dungcuz Swciyen Fuluz Myauzcuz Yangh、Dungzloz Myauzcuz Yangh、Gauhgih Yauzcuz Yangh faenbied guh hozdung angqhoh laebbaenz 40 hopbi, gak cuz vunzlai dangdieg doxcomz giz ndeu, ciengq go diuq foux, doxcaez daeuj angqhoh gienh saeh hung neix. Swcigih Minzcunghveij baij vunz bae daengz dieg cukhoh.

10 nyied 10 hauh, Fuluz Myauzcuz Yangh hozdung yienhciegz vunz lai vunz daih, nauhyied raixcaix. 《Golaux Dungcuz · Myauzcuz Gingqlaeuj Coux Hek》hainduj hwnj ciengz yienj, gyoengq canghheiq ndang daenj buhvaq minzcuz gyaueget, yienj gij go foux gig miz minzcuz daegsaek de. Foux 《Ciengj Bauqva》《Cien Aen Saz Roengz Yungzgyangh》《Caij Din Venz》daengj cezmuz gangjok le gak cuz bouxminz gyaepgouz caeuj maqmuengh ndaej gwn ndei youq ngaih. Go buenx foux 《Gou Gyaez Ranz Gou, Gou Gyaez Fuluz》gangjok gij cingz gak cuz bouxminz ndiepgyaenz Mbanjmyauz Fuluz. Yienhciegz yienjheiq ndei yawj raixcaix, bouxyawj dopfwngz haenhndei. 10 nyied 11 hauh, youq Dungzloz Myauzcuz Yangh hozdung yienhciegz, yienjheiq caemh ndei yawj dangqmaz. 《Gyong Myauzcuz Roq Singj Munggyangh》《Dungzloz Gyaundeij》《Sing Venz Mbanjmyauz Goksadsad》daengj go foux minzcuz, langhbaij le gij yinxdaeuz vwnzva daegbied gagmiz caeuj gij yienghsienq cingsaenz gvaekgvaek gak cuz bouxminz. 10 nyied 12 hauh, youq Gauhgih Yauzcuz Yangh hozdung yienhciegz, gyoengq bouxyienj yungh fwen Mbanjyauz, go foux minzcuz daengj cezmuz, langhbaij 40 bi doxdaeuj gij bienqvaq hungloet caeuj gij cingz gak cuz bouxminz dazfwngz buekguh yamqcoh seizdaih moq Gauhgih Yauzcuz Yangh, yienhciegz miz haujlai vunz daeuj yawj.

Mwh guh hozdung angqhoh, yienhciegz lij langhbaij gij cingzcik hwngfat minzcuz yangh, gai gaiqgwn ndei daengj hozdung dem.

40 bi doxdaeuj, daegbied dwg Cibbet Daih Dangi doxdaeuj, Fuluz Myauzcuz Yangh、Dungzloz Myauzcuz Yangh、Gauhgih Yauzcuz Yangh ndaej yiengjsouh gij cwngeuz minzcuz dangj, gak cuz ganbu ginzcung haenqrengz guh baenaj, caezcaemh doxgiet buekguh、caezcaemh mwnhoengh hwngfat, ginghci hwngfat riengjret, ndawbiengz saehnieb guh baenaj, bouxminz gwndaen ngoenz ndei gvaq ngoenz, guhbaenz aen daihbuenz ndei: Ginghci hwngfat, aenbiengz huzndei、minzcuz doxgiet, gak cuz bouxminz youq ndei gwn ndei.



▲Fuluz Myauzcuz Yangh hozdung yienhciegz.



▲Fuluz Myauzcuz Yangh yienj fouxlungz.



▲Dungzloz Myauzcuz Yangh vunz-lai daenj buhvaq minzcuz daeuj ganj haw.



▲Swcigih Cukhohduenz、Liujcouh Si Daibyaujdonz、Sanhgyangh Dungcuz Swciyen Daibyaujdonz yawjngonz gij langhbaij Dungzloz Myauzcuz Yangh.



▲Gauhgih Yauzcuz Yangh vunzlai dangdieg daeuj yawj yienjheiq.



▲Gauhgih Yauzcuz Yangh biuj-yienj gofsouh 《Gauhgih Gyaundeij Coux Hek Daeuj》.